

# NIGITIWATAALE NIWAKATE TESSALÔNICA

Nigijo Tessaloniceensitedi nogoyalomegeteloco nagajo odoeje liwakate Paulo, eliodi oko modi Cristo nigicoa me dopitedijo. Odaa ijo ica anodi me dagadiaa leeditibige me nibaaga leegodi naga nipecti me dopitedijo Cristo. Odaa Paulo ja iditace nagadi eledi liwakate me yoxogotece niginoa libatico. Yalagata Aneotedogoji micota me iloikatidi nigina oko ane dogoyemaa moyowoogodi. Eledi yalagata ica maleedigicatibige daga dopitedijo Cristo, odaa dinikee ica goneleegiwa aneliodi nimawenegegi codaa meliodi mabeyacegegi. Pida Goniotagodi igeke nige dopitedijo. Paulo dipokota modipokoteloco nigina moyotaganene Aneotedogoji, codaa iige me leeditibige miditawece nibaaga moyakadi anoyopotibige.

## Paulo yecoaditibige Tessaloniceensitedi

**1** <sup>1</sup>Ee Paulo, Silas, iniaa Timóteo, jiwakateenagatibigagaji nagadi godiwakate ane emegee jidi. Jiwakateenagatibigagaji anakaami gonioxoadipi, ane iwagatitetiwaji Goniotagodi manitaga nigotaga Tessalônica, akaami ane gadexocitege Aneotedogoji Godiodi, iniaa Goniotagodi Jesus Cristo.

<sup>2</sup>Jemaanaga Aneotedogoji Godiodi, codaa me Goniotagodi Jesus Cristo midioka limedi meletagadomitiwaji, codaa mowo gadaalegenali mele.

## Nigica noko Cristo nige dopitedijo odaa iwi anigotediogi nigina oko leegodi libeyacegeco

<sup>3</sup>Gonioxoadipi. Leeditibige midioka limedi me iniotagodeegatalo Aneotedogoji, leegodi akaamitiwaji. Ele me iniotagodeegatalo Aneotedogoji, leegodi gatiwagatakanegegi idapaga diiticogi me ili, codaa jegepaanaga dagaxa madinemaanitiwagetiwaji. <sup>4</sup>Joanigidaa leegodi mokomaga idiniwenigidenaga akaami leegoditiwaji nigijo me idaliigatiogi eletidi lapoli loiigi Goniotagodi midiwataga eletidi nigotadi. Nigida moko idinanenagatibece leegodi midioka limedi manakatonni Goniotagodi, codaa madinatiitalo niginoa anodigotogowa metigodiatetibeci codaa me niginoa eletidi ane dakaketogodomi.

<sup>5</sup>Aneni me gadewiki ikee Aneotedogoji me igenaga nigica noko nige iwi anigotediogi me iloikatidi nigina oko leegodi libeyacegeco. Odaa Aneotedogoji

nige nadi me gadegenakitiwaji, odaa jagakatitiwaji makaatiwece ninioxadi midioka limedi midiaagoni. Leegodi mawikodeetiawaji niginoa nokododi leegodi mida anenitege Aneotedogoji ninioxigi. <sup>6</sup>Igaataga iniaaginiwa Aneotedogoji igenaga, odaa eote ane igenaga, nigeote lawikodigi nigidi oko anoyametibigajitiwaji. <sup>7</sup>Aneotedogoji eote manipenitema niginoa gadawikodico, codaa oko eledi najigotedogowa me inipenagatema niginoa godawikodico. Jigidaagigotedogowa Aneotedogoji nigica noko nige dinikeetace Goniotagodi Jesus me icogotedibigimece ditibigimedi, lixigagawepodi icoa niaanjetodi anida loniciwaga Goniotagodi miditaga. <sup>8</sup>Dinikee mina ica galewaga ane idi minoataga me iloikatidi nigina oko ane dogoyowoogoditeda Aneotedogoji, otegeaagaga oyiwaaditeda gobodicetedi anele aneetece Goniotagodi Jesus Cristo. <sup>9</sup>Nigidi oko agica liniogo me nawikodeega, odaa idioka limedi me naaga, leegodi idioka limedi me leegitalo moyetecetedice Goniotagodi, codaa moyetecetice nigica loniciwaga aneo me datale. <sup>10</sup>Goniotagodi iloikatidi nigidi oko nige dopitedijo. Pida nigidi liomagatagipi me nepilidi, nigidi bogoiwenigide mawatediogi, codaa nigidi anoyiwagadi odogetetibigimece. Akamagakaami aagaga awanitege nigidiwa liomagataka Aneotedogoji nigica noko, leegodi me iwagati godatematiko aneetece Goniotagodi.

<sup>11</sup>Joanigidaa leegodi midioka limedi me jotaganegenaga Aneotedogoji me jipokagatagalocotiwaji. Aneotedogoji eniditedagawa me gadegenaki me gadewiki, odaa nigina me jotaganegenaga, jipokagatalo meote me gadegenakitiwaji, odaa jogocaganegeni awii nigica ane yemaa. Eledi jipokagatalo me ibake loniciwaga me gadaxawanitetiwaji mawii nigica anele anemaani mawii, codaa me gadaxawani magoti idatawece gabakeditema leegodi manakatoni. <sup>12</sup>Joanigidaa awenigidenitiwaji Liboonagadi Goniotagodi Jesus Cristo, codaa Iniaaginiwa gadiwenigidenitetiwaji ane gadexocitege, leegodi Aneotedogoji iniaa Goniotagodi Jesus Cristo me dagaxa meletedogodomi.

### Ica goneleegiwa ane diigenataka ane dagaxa me abeyacegegi

**2** <sup>1</sup>Gonioxoadipi. Natigide jemaa mejitagawa anodaagee nigica lanokegi Goniotagodi Jesus Cristo, codaa nigica nige jatecogojogotege Goniotagodi. <sup>2</sup>Jipokagatagawatiwaji me dogokanicodaa iigi gadowoogo, codaa jinaga domaga anawela nigica oko aneetagawa jigicota noko Goniotagodi me dopitedijo. Igaataga yakadi me ligegi anigepidigica nigina anoyelogoditedibece lowooko Goniotagodi, ogoa migetaga anigepidigijo ane datematika ligegi, ogoa migetogodi me godidigo ane jidiigateloce godiwakate. <sup>3</sup>Jinigikani digica ane gadinaalenitece dagaleetigi daantigicota nigica noko Goniotagodi. Igaataga maleedigicota nigica noko eliodi oko eyamagaticoace moyiwagadi Goniotagodi codaa odakapetege Aneotedogoji. Odaa ja dinikee nigica goneleegiwa ane dakapetege inoatawece ane liigenatakanegeco Aneotedogoji, nigini Aneotedogoji jiginiaa iigetedicogi minitaga noledi ane daga ipe. <sup>4</sup>Nigini goneleegiwa dakapetege Aneotedogoji,

codaa minoatawece anodogetetalo nigina oko, codaa lakapetegi inoatawece niginoa anodiletibige nigina oko daga noenogododi. Nigini goneleegiwa eo me dagaxa me gonegegi me nagaxateloce inoatawece goneleegiwadi, codaa me niginoa niwicidi. Codaa icota midiaagi minitaga ligeladi Aneotedogoji digoida Jerusalém, odaa iniaagini ikatice nibodigi, mee, “Jegemegee Aneotedogoji.”

<sup>5</sup>Ida makaamitiwaji aganalakitibige ijo anejitagawa? Nigijio midiaagejo makaamitagatiwaji, eliodi me idalagata anodaagee nigica goneleegiwa. <sup>6</sup>Odaa owoogotitiwaji mini ica ane daga ika nigini goneleegiwa me dinikee nigina natigide. Nigini goneleegiwa idoka yakadi me dinikee nigica noko nige ika Aneotedogoji me dinikee. <sup>7</sup>Nigica niwigo aneo ane beyagi anicota me dinikee jigini me diba, pida ayakadi meote icoatawece nigicoa nibeyacegeco ane domaga yemaa meote nigepaagicota nigica noko monogatice nigini ane yolitege ane beyagi. <sup>8</sup>Odaa nigidiaagidi nigica goneleegiwa abeyacegegi jigicota me dinikee, odaa Goniotagodi Jesus yaagadi nigini goneleegiwa nige dopitedijo. Goniotagodi onexaa yaweteda, odaa ja yeloadi. Codaa loniciwaga miniwa yaagadi nigini goneleegiwa abeyacegegi. <sup>9</sup>Pida maleedigicota noko me yeloadi Goniotagodi, nigini goneleegiwa loniciwagawa Satanás, odaa ibake meote inoatawece ane latopaco godoxicegetedi, codaa me niginoa nibinico, codaa ibake loniciwaga me inaale eliodi oko. <sup>10</sup>Odaa jigidaagee nigica goneleegiwa ibake owidi nimawenegeco ane beyagi me ninaaletiniwace oko anicota midiokaanaga limedi me nigo. Nigidi oko idiokaanaga limedi me nigo leegodi me dogodibatege, otegexaagaga oyemaateda nigijoa notaga anepaga ewi. Dogodibatege nigijoa notaga anewi, daganagawini Aneotedogoji tegeote me newigatace.

<sup>11</sup>Joanigidaa leegodi Aneotedogoji me niige ica niwigo anida nimawenegegi me ninaaletiniwace nigidi oko, eotedibige moyiwagadi liwitakeco nigini goneleegiwa abeyacegegi. <sup>12</sup>Odaa Aneotedogoji diigenatakatediogi moiloikatidi iditawece oko ane dogoyiwagadi nigijoa notaga anewi, pida lemaanigi okanicodaagica anigidi ane beyagi.

### **Aneotedogoji godiomagaditedice meote me godewigatace**

<sup>13</sup>Gonioxadipi. Idioka limedi me leeditibige me iniotagodeegatalo Aneotedogoji leegodi akaamitiwaji, lemaanigipi Goniotagodi. Igaataga anigicatibige daga yoe nigina iigo, naga gadiomagatitedicoace Aneotedogoji meote me gadewikitace. Liwigo ibake loniciwaga me gadiomagatiticetiwaji miniokiniwateda me gadewikitema Aneotedogoji. Odaa leegodi me iwagatitiwaji niginoa notaga anewi, codaa me gadewikitema, odaa Aneotedogoji eote me gadewikitacetiwaji. <sup>14</sup>Aneotedogoji ibake gobodigi anele aneetece Goniotagodi ane jatematiigatedibece meniditedagawatiwaji mida anenitege, codaa me gadiwenigidenitetiwaji awanitege Goniotagodi Jesus Cristo. <sup>15</sup>Enice, gonioxadipi, oleetibige midokee matiteteloco gatiwagatakanegegi, codaa otetenitiwaji nigijoa niigaxinaganegeco aneetece

gotiwagatakanegegi, ane jiiḡaxinagatedagadici nigijo me jelogotagatedagawa, codaa nigijo me jiwakateenagatibigagaji ḡodiwakate notaganagaxi.

<sup>16-17</sup>Aneotedoḡoji ḡodiodi ḡodemaa, odaa leegodi meletedoḡodomi najigotedoḡowa midioka limedi mabo ḡodaalegena codaa adinelio mabo ḡodaalegena, codaa meote me inibeonagatege lanokegi ḡoniotagodi, me daga jawienatakanaga. Jemaanaga miniaaginiwa ḡoniotagodi Jesus Cristo iniaa Aneotedoḡoji ḡodiodi mowo ḡadoniciwagatiwaji codaa metiḡadoniciwagati mawii, codaa me enitece inokina anele.

**Paulo dipokotiogi Tessaloniceensitedi modipokoteloco  
nigina moyotaganege Aneotedoḡoji**

**3** <sup>1</sup>Gonioxadipi, jiditedini owidijedi yotaga. Jipokotagawatiwaji mipokitogoloco nigina motaganegeni Aneotedoḡoji amaleegaga age milaagitedice nibodicetedi anoyalagatalo ḡoniotagodi, codaa amaleegaga nigina oko ele modibatege nibodicetedi, digo aneni mabaateḡetiwaji. <sup>2</sup>Eleditace ipokitogoloco nigina motaganegeni Aneotedoḡoji me ḡodatamagateetege niginoa ḡoneleegiwadi loidenaga, codaa mabeyacagaga, iḡaataḡa aḡinoatawece ḡoneleegiwadi oyiwagadi ḡodatematiko.

<sup>3</sup>Iḡaataḡa ḡoniotagodi idioka limedi meote nigina mida ligeḡi. Odaa yajigotedaḡawa ḡadoniciwagatiwaji me diḡikani me iwitece, codaa ḡadotetenitetema inoatawece ane beyagi nigina me dineetaḡawa diaabo.

<sup>4</sup>ḡoniotagodi eote me jakataḡa me ḡadinakatoneḡegitiwaji midioka



(2 Tessalonicenses 3.1)

limedi mawii ane igenaga. Ajawienatakanaga mawii codaa midioka limedi mawii nigijo ane jiigenagatagawatiwaji.

<sup>5</sup>Jipokagatalo Aneotedogoji meote midioka limedi memaani ganioxoadipi digo mijoataga anee me godemaa, codaa jipokagatalo me yajigotedagawa gadoniciwaga madinatitalo gadawikodico digo mijoataga Cristo me dinatiteta lawikodico.

### **Leeditibige me jibaaga me jakataga ane jopoogatibige**

<sup>6</sup>Gonioxoadipi, jibakenaga nagatetigi Liboonagadi Goniotagodi Jesus Cristo me gadiigenegegi motoniticoace nigidi gonioxoadipi ane nigojigipi, codaa nigidi agoyemaa modioteci nigijoa godiigaxinaganegeco baanaga jiigaxinagatece. <sup>7</sup>Akamagakaamitiwaji owoogoti me leeditibige manowikita anejinaga me godewiga. Igaataga nigijo maleegidiaagejonaga makaamitagatiwaji, agoko nigojigipi. <sup>8</sup>Agica idi ane jibagatege daataga jedianaga lojedi. Pida nigida moko бага jibaaga negepaa inigaaxaga. Jibaaga noko, codaa menoale, jaogatibige me daga jikanagatece godiwaagatiigi eledi oko. <sup>9</sup>Ida gonagatetigi me jibagatege ane domaga leeditibige manajicitogowa, pida agica daga jipokagatagawatiwaji me godaxawanegegi, jaogatibige manowikitogowa anejinaga me jibaaga. <sup>10</sup>Igaataga nigijo midiaagejonaga makaamitagatiwaji, eliodi me gadajoinenegitece me nigina ane daga yemaa me diba, ayakadi daganiodi.

<sup>11</sup>Ejinagatagawa nigidiwa notaga leegodi jibodicaga midi oko nigojigipi anawanitegetiwaji ane dogoyemaa me nibaaga. Anibaaga, pida oyalomege eledi oko anee lewiga. <sup>12</sup>Jibakenaga nagatetigi Liboonagadi Goniotagodi Jesus Cristo me jiigenagatibigiwaji codaa me inajoinagatiniwace me leeditibige me ilagatibigiwage, codaa me nibaaga amaleegaga odinigaanyetece anoyopotibige me newiga.

<sup>13</sup>Pida akaami inioxoadipi, jinaga anigaaxe me oeni anele. <sup>14</sup>Nigica ane degeyiwaagadi nagadi godidie, oada awini anigini nigica oko, oada otonitice, amanagawini niboliga. <sup>15</sup>Pida jinaga ademiita micataga daga gadidelagawa, бага aladeeni micataga ganioxoa.

### **Owidijegi lotaga Paulo me dibodenaga**

<sup>16</sup>Jemaa Goniotagodi, niginiwa aneote mele godaalegenali, midioka limedi meote mele gadaalegenali okanicodaagica anenitiwaji, Jemaa Goniotagodi midioka limedi miniwa makaamitaga, akaamitawecetiwaji.

<sup>17</sup>Ee Paulo, emegeee jidi niginoa owidijedi yotaga, me gadibodenitiwaji me jikeetagawa mewu negemaga jidi nagadi notaganagaxi. Idokejigotalo inoatawece yotaganagaxiidi ane jiwakatee.

<sup>18</sup>Jemaa Goniotagodi Jesus Cristo midioka limedi meletedagadomi, akaamitawecetiwaji. Oada jigidaagee (Amém).